



13. juli 2016

UKA2016/110

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Naalakkersuisut kingusinnerpaamik UKA 2017-imi siunnersuummik savaateqarfinnik tunisinerni tunniussinerniluunniit savaatillit akiitsuunik tamakkiisumik ilaannakortumilluunniit isumakkeerinnissinnaalernermik pisinnaalersitsisumik saqqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Tunnngavilersuut:

Maanna ukiuni arlalinngortuni savaateqarfiit imminnut akilersinnaanngortinneqarnissaat pingaarnertut isumaavoq. Taamattaq ukiuni arlalinni savaateqarfiit immiut akilersinnaasumik ingerlasinnaasumik toqqammavissaqaraluartut, akiitsuunik piginnittuusimasunit kingornussanit oqimaatsorsiorinneqarput. Akiitsut isaatitsiniarnermut ajornakusoortitsisinnaanerit tamatta nalunngilarput. Arlaliuvugullu savaateqarnermik inuussutissarsiutip ineriartortinneqarnissaanik sulissuteqarumalluta neriorsuisimasut, taamaammallu manna iliuseqarluta akornutaasut peerneqarnerisigut immiut akilersinnaanngortitsisinnaanerit periarfissaqarput.

Nalunaarusiami *Kalaallit Nunaanni nunalerinermut siunnerfilimmik tapiissuteqartarnermi*¹ ima oqaasertalimmik kaammattuuteqartoqarpoq:

Tamakkua saniatigut inassutigaarput nunalerisut akiitsutoqqanik tatisimaneqartut akiitsuusa isumakkeerinniffiqeqarsinnaanerit misissorneqassasoq, assersuutigalugu matumani pineqarput siusinersukkut nunaatillip akiitsui maanna piginnittup kingornussai.

Siunnersuut akuersissutigineqassappat aningaasat ESU-mik taarsigassarsinikkut pissarsiarineqartut, inatsisini immikkut aalajangersagaasut aamma kalluarneqassapput. Immikkoortoq tamanna suliarineqalinngippat pissutsit allanngorsinnaanngillat. Allannguisoqarnissaanik isumaqarutta aalajangiusimannittariaqarput. Taamaaliornitsigut aningaasat kaaviiartitat tassannga inuussutissarsiortut pilersitaat nunatsiniitiinnarsinnaavarput, taamaalillutalu nammineq tunisassiarisinnaasatsinnik eqqussuinerit akiliinissaq pinngitsoortissinnaassallutigu.

*Nunalerineq pillugu ESU-mik nassuiaat*² naapertorlugu savaatillit katillugit 26 million koruuninik akiitsoqarput.

Nunalerineq pillugu ataatsimiititaliarsuaq³ naapertorlugu nunaatillip akiitsui ikinnerit 79.472,-

¹ *Kalaallit Nunaanni nunalerinermut siunnerfilimmik tapiissuteqartarnerneq* CE Copenhagen Economicsip Aalisarnermut, Piniarnermut Nunalerinermullu Naalakkersuisoqarfimmut 25. april 2016-imi suliaa

² *Nunalerineq pillugu nassiaat* Aalisarnermut, Piniarnermut Nunalerinermullu Naalakkersuisoqarfik april 2016

³ *Landbrugskommissionens betænkning februar 2014*

kr-iupput, akiitsullu annerpaat 1.656.134,- kr-iullutik. Nunaatillit akiitsui agguaqatigiissillugit 735.000 kr-inik annertussuseqarput.

Ikinnerussuteqartut savaateqarfimminnik tuniniaapput. Savaateqarfimminnilli tuniniaasut akiitsunillu pisisumut ingerlatitseqqiffiusussat siunnersuutikkut ikiorserniarneqarput.

Savaateqarnerup nunami atortunik annertunerusunik pisariaqartitsinera pissutigalugu, Namminersorlutik Oqartussat akiitsunik isumakkeerinnittarnermik pilersitsineranni savaateqarneq nunaateqarnerlu assersuutigalugu aalisartunit piniartunillu immikkoortillugu isigineqartariaqarpoq.

Maanna ukiuni arlaqalersuni savaateqarfiit imminnut akilersinnaangortinneqarnissaat arlaleriarlugu Inatsisartuni suliarineqarpoq. Taamaammallu inuussutissarsiutip qulakkeerivigineqarnissaa pisariaqarpoq.

Iliuseqarnissaq pisariaqarpoq. Inatsisartuni ilaasortat siunnersuummik akuersissasut neriuppunga.

Siunnersuutip pisortanut aningaasatigut allaffissornikkullu kinguneqaatissai:

Tunngavilersuutini taaneqareersutut savaateqarnermik inuussutissarsiortut akiitsui katillugit 26 mio kr-it missaannik annertussuseqarput. Savaatillit tamarmik ataatsikkut ingerlataminnik tunisiniarlutik tunniussiniarlutilluunniit aalajangissagaluarpata, aningaasat isumakkiigassat annertooujussuussapput.

Piviusorsiortumi isigalugu tunisinerit tunniussinerilluunniit annikinnerujussuarmi inissisimassapput. Tunisinerimili tunniussinermiluunniit tamakkiisumik ilaannakortumilluunniit isumakkeerinninnissamik periarfissaq, inuussutissarsiummi kinguaariit nikinnerisa pilertornerusumik ingerlanerat kingunerissavaa, taamaammallu tunisinerit/tunniussinerillu amerlassusaat akiitsunik isumakkeerinninnissamik atortitsilernermi maannakkut atuuttunit annertunerulernissaat takorloorneqarsinnaavoq.

Allaffissornikkut suliassat siunnersuutip piviusunngortinneqarneranut atugassat AC-p ataatsip ukiup affaani sulieratut annertussuseqassangatinneqarput (250.000 kr). Tamatuma saniatigut inuussutissarsiummik ingerlatsisut akiitsunik isumakkeerinninnermik periarfissanik atuinerat naapertorlugu, isumakkeerinninnermik sulianik isumaginninnerit ingerlanneqartassapput. Taakkulu pioreersut atorlugit isumagineqarsinnaasutut ilimagineqarput.

Siunnersuutip aningaasatigut allaffissornikkullu namminersorlutik inuussutissarsiortunut kinguneqaatissai:

Siulerisap akiitsuinik akilersuinani ingerlatsineq, savaateqarnermik inuussutissarsiortunut nutaanut imminut akilersinnaasumik savaateqarnermik ingerlatsilersinnaanermik ajornanginnerulersitsissaaq. Nunalerinnermik patajaallisaaneq ammaananeqassaaq, tamannalu naammassisinnaasat annertunerulernerannut peqataaqataassaaq, savaatilittullu ingerlasut sinnerisa aningasaqarnerannut pitsanguissalluni.

Tamatuma savaateqarnerup attatiinnarneqarnissaanut periarfissat pitsaanerulernerat qulakkiissavaa, taamaalillunilu aamma nunatta neqinik imminut pilersorsinnaaneranut, neqinillu avataanit eqqussukkanik annikilliliineq qulakkeerinniffigeqatigissallugu.